

FAULA IV.

I SCALAVRON E J AVIJE.

Na nià d' Moscon scapà dant un fournel
 A forssa d' scopas e d' abuton
 Intra ant un buss d' Avije pien d' amel.
 Ste si l' han avù pour d' coui barbison
 Dl mouro piat , dl vistì scur , d'i stivai lust ,
 E son strmasse tute ant i canton.
 J' atri trovand l' amel ch' avia bon gust ,
 Trovahn j' Avije divise an doui parti
 Son fasse lour padron com' a lè d' giust ;
 Jè sta pi gnun mojan d' feje surtì :
 L' ero crudèi e dur coum d' scalin ,
 E a forssa d' ujonà s' fasivo ubdi.
 Vedendse a la miseria, na matin
 J' Avije pì decise a fan consei ,
 D' andè trovè l' Argina ant so cambrin ,

Pr vdde qual partì saría sta 'l mei
 Pr dè la pala-al-cul a sti tavan ,
 Ch' j' avivo già rusià mesi i coutei. *
 'L vout preponderant dl gran divan ,
 Lè stait d' spedì prest un ambassadour ,
 Ch' andeissa vers la val dl rabadan ,
 Dov' j' era sula sima d' una tour
 Una tribù famosa d' Galavron ,
 Ch' fasía mac la guera pr l' onour ;
 E là ch' a j' esponeis la situassion
 Dle soe finanse povre e dl so buss ;
 E la rapacità d'i brut moscon
 Disendje : se ant vost cœur ancour ai fuss
 Un pò d' misericordia , e un pò d' pietà
 Pr tante povre Avije ch' son ai uss ,
 Adess lè temp d' usela , e d' avnì là
 Con na legion antrega d' tiralieur
 Tuti caussà , vistì , e bin armà,
 'L cap d'i Galavron *zin-zon-val-fleur*
 (Ai dis) , ambassadour , crussieve d' nen ,
 Noi souma penetrà d' vostri maleur,
 Risponde a vostra Argina ch' son an tren
 Tuti i me bravi , e voi an dontrè-dì
 I rivedrè l' aurora , e 'l ciel seren,

* Gli alveari. .

Noi i vnirouma espress pr custodi
 Vostr' amel , vostra sira , e vostre ca :
 Cioè pr libereve e niente d' pì.
 Eroe Galavron , dunque a sarà
 (L' autr ai ripet) da coui bruti barbis
 Netià la ca dj' Avije e liberà ?
 Ah voi i sarè sempre nostr' amis :
 Noi i farouma an sira un monument
 Tribut d' riconossensà a vost, pajis !
 Dit lò soupata j' ale e part content ,
 Porta la neuva ai aitre , e all' indoman
 Sento sonè le trombe vers ponent.
 L' armada arriva li tambour batan :
 As vddo contra 'l sol tuti a lusi
 J' abitator dla val dl Rabadan.
 Taco bataja , e li i Moscon ardì
 Apres es-se difeis con gran calour ,
 A son restà disfait e sbalourdì ;
 Ma appena i Galavron son vincitour ,
 A son butasse lour a comandè ,
 E j' han robaje 'l rest ch' avlo ancour ;
 J' Avije disperà s' buto a piourè :
 Disend : oh iniquità ! elo così
 Ch' i l' havì prometune d' tratè ?
 Zin-zon a l' a promess d' mandeve sì
 Pr avnine liberè , dene bras-fort ,
 Ma nen pr sacheggiene i nostri nì.

**E voi pr la rason ch' i se pì fort ,
J' avì scassà i tavan pr piene 'l rest :
Oh com l' è deplorabil nostra sort !
Giovnot i' parlo a voi con sto pretest ;
Sta sì lè mac na Favola , lè vei:
Ma pur a l' è un esempi manifest ,
Ch' arriva tuti i dì fin tra fratei.**
